

爾爾書屋詩草

爾爾書屋詩草卷二

樂亭 史夢蘭 香厓

七言古

書劉伯溫傳後

誠意伯稱留侯比興漢興明殊相似中書不拜小明王
西湖望氣軒然起高安如逢黃石公青田偏少赤松子
嗟嗟術數與天文不救身爲小犢死

石丈人歌

有序

石爲玉田孫氏舊物上鐫亦丈二字家從父得

之命爲之歌

嵌空玲瓏一石叟古貌巍巍神不朽清癯合是米顛兄
光怪豈同夏王母何處得來種玉田昔聞曾載鬱林船
主人沒後無知己棄置泥塗三十年今朝乞得置書屋
頓覺几席生巖谷汲取寒流洗舊塵重見廬山真面目
恍如天上丈人星夜半墮地光熒熒又如東嶽丈人峰
飛來不受白雲封星耶峯耶果何許我欲問石石不語
眼底煙雲幾代更依然不改貌崢嶸安得與丈同不老
隨風直上蓬萊島

述古

盛世重詩書叔季重律例詩書培本源律例資趨避科
條初定時準經以取義後來法愈多一法滋一弊官吏
習深文奸宄生倖冀羅織藏危機善良少全地所以古
與今治道分隆替宰相不用讀書人英雄猶困刀筆吏
接臧友山孝廉

維城

書兼示見懷及出關紀程諸

作賦此代柬

春風昨夜搖窗扉枕上驚聞鴈北飛忽報尺書自天落
讀君新句如君歸燈前一讀一歎息讀罷新詩淚沾臆

八客方知行路難
催人不覺年華徧
憶昔秋齋送別時
清霜涼月滿庭堦
鑪灰撥盡猶溫酒
蠟淚消殘尙索詩
風霜轉瞬更裘葛
春樹暮雲思若渴
喜見雙魚出水濱
愁看孤鳥投天末
人生枯苑渺難知
得失窮通天所司
壯志無須悲馬榬
奇材豈肯寄人籬
故園風物今猶昔
礪石蒼蒼滄海碧
行役應思母倚闥
望夫還恐人成石
兔走烏奔總不閒
歸期何日唱刀環
勸君莫讀河梁集
紙上模糊半淚斑

送梅雪坡

一清

任無爲州別駕

粵東才子梅子真廿載蹇滯京華塵策書十上不得志
天心有意窮詩人慕君高誼締君交燕臺詩酒常招邀
燈前論史壺頻碎花下聯吟鉢屢敲旦夕追歡契復契
嶺南忽報妖氛熾破虜誰驅北府兵思親空灑南雲淚
欲歸不歸心茫然虎門烽火羊城連劉賁下第悲無限
阮籍窮途更可憐今年佐郡廬州地半刺風流雞肋細
知君枳棘非久棲歎我匏瓜尙空繫江南江北兵滿途
巢湖鵲渚古東吳君行若上濡須望爲問紫髯今在無

書陰烈婦傳後

有序

烈婦姓李氏邑處士陰鳴岐室鳴岐沒三日烈
婦題詩壁間自經死

有女有女李印孃幼習書史明綱常家中進士恨不櫛
父母掌上明珠光陰即卓犖名家子鏡臺締姻門相當
卻扇吟成年及笄佐郎定省勤溫涼暇時閨中相磨勵
墨楮不僅事詞章戚黨羨歎舅姑喜雙雙璧人家之祥
詎料鸞鳳中路拆擗踴痛哭摧肝腸此身決意辦一死
還將溫語慰姑嫜歸房閉戶焚手蹟夜半開篋理衣裳
春蚓秋蛇走虛壁愁紅慘綠繞空梁家人驚覺斬戶入

嚴妝如故身已亡煌煌旌典輝彤史皮金翦字骨猶香
吁嗟平節烈亦自婦職爾難得從容竟如此忠臣殉君
婦殉夫不負所學無二理君不見芻靈焚時火珠紅精
魂相攜訴蒼穹又不見阿母哭兒不待訃音通兒果死

矣五日中午

事詳本傳

植枸杞

凌晨坐南窗花徑無人掃中有枸杞生棄置同幽草瓦
礫相蔽虧枝葉成枯槁移來石畔栽灌溉酌寒煖人言
此靈根仙家祕爲寶千年化靈厖食之多壽考我生無

仙姿修短憑大造不讀養生書不識長生道漢武與秦
皇誰見升蓬閣但乞仙人杖早成三十年後扶我老

韓御史釣臺歌

一柱峰前水如注旁有石磯臨古渡舟人指點說遺蹤
云是韓公棲隱處韓公化去三百年至今遺愛留人間
出爲司李入侍御緋魚驄馬鵷鸞班我昔少年讀公傳
如從紙上覩公面有腳陽春宋廣平雍梁克豫行皆遍
蒼生待命方殷殷掉頭忽爾辭朝紳十載恩膏布陰雨
半生富貴輕浮雲古來勇退誰如此乞歸年甫踰強仕

月白高樓當菟裘

釣臺舊有月白樓

圖書花鳥供驅使釣臺上

山崢嶸釣臺下水澄清先生所樂在山水山水因以先生名君不見君家淮陰功第一當年羞與噲等匹釣臺一去不歸來終教呂雉囚鍾室人生隱見須有時塞翁禍福尤難知我今獨上釣臺望俯仰高躅生遐思子陵不仕漢尙父終臣姬渭濱嚴灘同釣耳一出一處不相師先生出處俱不苟遂合千古名臣高士兼得之我生四十猶潦倒名場端合抽身早願向先生借釣臺一竿坐對江天曉

諺語樂府

近閱崔念堂詩草見其中有諺語樂府四章首句俱用諺語引起語含勸戒斯能於白樂天新樂府外獨開生面者因效其體

好事不如無芝草當門終必除多事奚如無事好世本無事人自擾人生自有當爲事無事覓事彼何意

弄巧反成拙巧亦胡可弄自智而愚人請君還入癡巧拙天所生弄巧天所憎人心固巧天更巧弄巧成拙徒自惱

閒時置忙時用未雨徹桑須鄭重忙時用閒時棄過河
拆橋如兒戲閒時棄忙時忙臨渴掘井徒張皇

澆花澆根交人交心吁何爲乎世人結交須黃金

看人三隻眼見人不見已不知已一身常有十目視十
目視十手指君不見千人所指無病死

賣獸賣獸售主不來有獸不買自謂不獸有獸必賣亦
是真獸賣獸賣獸還我獸來

津門健令行

有序

津門健令行爲謝明府作也明府諱子澄字雲

航四川人以孝廉宰天津廉明慈惠才武過人
津之士庶咸愛戴之咸豐癸丑初冬粵匪擾及
津門畿輔震動公率鄉勇禦賊於城西黃家墳
斬獲千餘級賊前隊殲除幾盡旣而賊衆大至
公又設計誘之屢挫其鋒賊遂退保獨流爲自
守計公之戰也每出必身先士卒士氣踴躍莫
不一以當百以故屢戰屢勝十一月二十四日
與賊戰賊已卻矣因主帥鳴金太早賊復反追
公徒步殿後身被數創力竭無援遂自沈於河

踰日有水類牀載屍浮水上軍民環視痛哭如
喪所親通邑皆縞素焉噫自賊犯順以來所過
城邑往往望風而靡向使守土者盡得如公賊
安能飛至於此而公亦何至捐軀鋒鏑也余曾
識公於盧龍因感賦此什

賊氛未至令先來危城得保真幸哉賊氛未滅令先死
未燼餘灰復熾矣當今誰是真將軍煙閣雲臺望策勳
帳下貔貅三百萬喪師失地何紛紛謝公作宰津門下
本是西川一儒者杜母仁能徧邑閭馮魴武更嫻弓馬

夜半妖星照郭門滿城鼙鼓驚心魂謝公聞之奮袖起
一麾義勇如雲屯嗚呼鄉勇胡能此下之好義上所使
負擔爭先進糗糧稱戈誓欲同生死手提短刃入賊壘
賊騎當之皆披靡么麼相戒避其鋒共稱南八真男子
國中漫道虛無人忠勇從茲讓小臣壯士方期張赤幟
孤軍詎料沒黃巾身先士卒還奔殿剝血淋漓猶步戰
鐵騎哀嘶失主歸河冰乍拆天飛霰軍民痛哭風雲愁
一時婦孺服皆變踰日屍浮水上來英靈未改生時面
立祠贈爵國恩優殺賊猶爲厲鬼不夢醒黃梁剛一

瞬公有所輯黃桑
夢詩鈔數卷

名垂青史已千秋健哉公止一縣令

竟能奮勇捐軀命若假斧鉞使專征賊氛安得猖獗如
梟獍吁嗟公止一縣令

沅陵烈婦行

并序

烈婦姓羅名兆漪辰州沅陵人湘南顧復齋繼
室也幼靜敏喜讀書見辰志有杜氏絕命詩三
章每咨嗟諷誦母訶其不祥年二十八歸復齋
咸豐壬子粵匪擾湘楚合省戒嚴復齋攜家避
於鄂婦之母亦隨居焉是年冬賊陷岳州婦謀

北行促復齋買舟適守土者倡兵以衛民之說
錮不得出婦曰城廓兵單戰守俱不易此地恐
爲我等死所矣城陷之日投屋旁井中死明年
正月賊遁絕屍出面色如生時距投井已三十
八日矣張鐵珊學博以狀索題賦此

武昌城頭黑雲起礮聲如雷轟地底東家藏匿西家逃
雞犬飛鳴兒女嗥妾家本在沅陵住避兵湖北離鄉樹
妾來湖北寇復來四郊火起城門開妾身可死不可辱
屋旁井是清涼屋

句用狀中語

妾有母老妾心悲夫能代養

妾暝目城中城外女如茶去或被擄留被污妾魂縹緲
誰伴侶泉下早有逆流女

辰志杜氏稱
逆流女子

題山城春曉圖

遠山蒼蒼近山紫花霧冥濛漲春水城頭初日上浮屠
林深似聞啼鳥喜鳥啼深樹何處尋曲徑東西迷尺咫
白雲斷處飛紅雲樓臺金碧參差起江南春色畫不如
天工奪付雲林子研朱滴露寫溪山興酣落筆雲滿紙
四時最好是春遊問柳尋花行且止披圖高喚過橋人
我欲攜壺陪杖履

癸亥九日遊水巖寺醉後口號

招攜山寺作重陽歡然共倒菊花觴
短筇扶醉陟崇岡
遠山近山爭低昂
松濤捲地天風涼
無邊秋樹紛丹黃
清泉入聽滌俗腸
從茲脫却名利韁
洪崖浮邱翼兩旁
乘風直欲凌穹蒼
龍山落帽無此狂
我別此山三十霜
烏飛兔走雙輪忙
追維舊事如亡羊
世人誰到白雲鄉
求仙鹿鹿嗤武皇
山水之間足徜徉
登臨但願腰腳強

題劉華社邑侯看劍引杯長小照

袁公好劍通劍術
白虹繞指風雨疾
劉伶頌酒稱酒功

一杯天地皆春風丈夫意氣貴磊落局促何取轅駒同
我公好酒復好劍星宿羅胸吐光爛繪圖斷取杜陵詩
看劍引杯情不厭數年作宰臨巖城連天荆棘豺狼行
從戎誓掃妖氛清鹿盧常向腰間橫紅旗報捷將軍營
賞功天錫冠帶劍公以軍功
賞戴藍劍今來下邑多循聲撫民詰
盜勤勞并吁嗟我公胸次何不有割雞暫屈屠龍手披
圖識面兼識心浩氣英風世無偶我願提此劍更願攜
此酒秋風射虎古北平短衣匹馬隨公後

登仙臺頂

驪城城北山鼓鼓就中秀拔仙臺峰卅年望之未能上
常恐風雨迷樵蹤今來重九日晴霽賈勇而上偕冠童
攀蘿捫葛覓苔磴長松夾路鳴天風羣山漸漸覺低伏
千巖萬壑來朝宗鳳巘龍潭列左右五峰對峙分西東
山有東西五峰南望溟海在眼底日光下注玻璃紅帆檣萬點
亂巖乙巘嶼想像蓬萊宮七里之海如杯勺灤江一綫
紛橫縱下視城郭與村落蒼茫一氣開鴻濛峰巔闢梵
宇紺碧光融融排雲駕霧勢縹緲呼吸可與帝座通仙
臺之高何龍從仙人傳是白兔翁云有靈藥在絕頂服

之白日能飛冲我今到此眼界豁何止雲夢八九吞心
胸我聞北溟有魚南有鳥飛騰變化窮實中人生何爲
居甕底百年甘作醯雞蟲登山不登頂終與不登同寓
內山難更僕數安得一一著屐筇十二州中環巨鎮虞
帝望祀秦皇封茲山之遊已稱快何況東泰西華南衡
北恆與中嵩佗年會當結伴遊五嶽倒騎日月凌虛空

止園看花有感

去年秋暮來山中霜林葉比春花紅今來山中春正煥
花已酣紅葉微綠紅紅綠綠何交加青松襯出頻婆花

更有梨花白如雪
夭桃穠李紛橫斜
香雲一片凝不動
有時礪底微風送
危坐盤石恣吟賞
恍疑身入天台洞
憶昔田盤遊經今
已十秋當時正值
春花爛花前對酌
偕朋儔朋儔共有
買山志今日買山
人已逝

謂楊魯田
常職卿

傷心宿草蓋荒墳
延陵挂劍終何濟
花開花落能幾時
春去秋來恆如斯
但願年年花事盛
一杯常向花前持
史忠正公遺硯歌
爲家舍人蓮生賦

烽照竹園紅血埋
梅嶺碧忠魂毅魄
不可招遺硯猶存
一片石左畔鐫公
字右畔鐫公容史
稱短小精悍目爍

爍今見此硯如見公明季冠如麻移符草檄日紛拏公
撫此硯應咨嗟南朝方唱無愁曲燕子春燈送殘局痛
哭陳書總不聞淚眼汪汪對鸛鵒內有好相外有悍將
公處其間籌兵籌餉兵餉空如揚州事徂乙酉四月十
九書家書絕筆二十一日日未晡不知此硯尙侍左右
無我間玉帶生紫衣光奪目文山授命歸謝朝淒涼會
伴西臺哭物以人而傳人榮物不辱公旣文山之後身
此硯當與生同族流落人間世幾遷落君肱底供磨研
從今簪筆騰華箋朝朝視草綸扉前硯何幸際承平年

吾家宗袞靈在天亦將於此式憑焉慎勿令成三災之
石有愧於前賢

爲邑侯蔡公少川題金壽門畫梅

江南十月天飛霜梅花先已回春陽前江後山老書屋

壽門居湖上構前江後山書屋千樹萬樹凝寒香昔耶居士畫成癖畫

梅不數梅花王南窗走筆自寫照露枝烟蕊爭芬芳咄

哉畫梅並畫竹花下森森聳寒玉墨君來伴墨夫人

李忠

定賦墨梅詩有云世呼墨竹爲墨君此花宜稱墨夫人亭亭品格俱拔俗我聞居

士畫竹師石室石室畫法古無匹又聞居士畫梅師玉

蟾玉蟾畫品拔塵凡今觀此圖工變化青由藍出深於
藍況乎詩古字亦古鄭虔三絕洵能兼流傳今落使君
手高挂琴堂光動牖與梅共結歲寒盟竹解虛心堪作
友何年竹帛勒名勲侘日調羹定屬君我今題詩無別
說惟祝廣平心似鐵

李小泉盼雲軒畫傳歌

兩大之間皆畫稟畫工惟有化工巧形成在地象成天
形象區分億萬千山川草木與蟲鳥一一樣出鴻濛前
無心作畫畫惟肖有心求之或未然我聞施采作會始

於有虞氏山龍華蟲宗彝藻火及粉米世傳帝妹顓首
開畫先其說當亦由乎此神禹鼎傳巖圖象物審象胥
形模周官畫績有分職青白相次五色俱漢魏以來益
好事殺粉調鉛出新意曹衛顧陸樹前型董展孫楊稱
後繼唐有二李與二閻宋則營邱實寡二迄今古畫片
楮無大抵桓多書畫舟中遭散棄宣和內府號多藏靖
康流亡隨二帝元明真蹟已寥寥何況尙論漢魏六朝
唐宋與五季世之耳食流好古古多僞豈知畫好原不
分古今真形日日在天地黃梁覺客

小泉別號今龍眠興酣

落筆霏雲煙仿古不爲古所泥畫成古迹皆蹄筌人物
吳生雲山王墨花果趙昌翎毛崔白不專一家而成家
不拘一格而入格白描墨暈各有宜寫意傳神俱無迹
鏤成畫傳傳林搨之萬本壽萬奕君不見王安節胡
曰從芥園竹齋異而同視此都應拜下風妙在有意復
無意想見盼雲軒褰解衣槃礴神行空化工無定稟畫
工有譜錄此乃化工之筆非畫工觀者勿徒奉爲畫傳
讀

孝烈徐氏哀辭

徐氏湖南善化人直隸知縣浦然女也幼通書
史寡言笑年十八母疾革醫不治潛割肱以療
母二十一歸湖北李君埰爲繼室李以知州需
次直隸丙寅七月奉檄海運歸病篤於八月十
二日卒踰結襁甫十有八月也氏視含殮畢誓
以死水漿不入口者六日父慰之曰而姑旣早
世舅又需次山左而夫前室之女而女也而夫
故妾之子女而子女也而遽死子女何依無已
盍俟而舅命泣曰諾理家事如故數日舅遣嫗

至視喪具并取孥行氏惓惓以子女爲屬夜半
東嚮哭拜訣舅又遙拜父母入室撫子女未畢
長號而絕僕婦理襟帶餘所食斷金數事時同
治五年八月晦距夫死十有八日也制軍劉公
上其事 古予旌年二十有二海甯陳明府錫麒
爲作傳湖廣同鄉官持啟徵詩因作此辭以哀
之

昔讀孝娥碑孝娥痛父沈江湄又讀烈女操烈女殉夫
以死報孝也烈也皆天生千秋日月爭光明有一於此

已難覩况云孝烈一身并賢哉徐氏女焜燿掌珠擎母
今忽遘疾百藥醫無靈素承母教嫻女經割股往事心
常銘我股親之股我肱親之肱剖肱療母同割股天心
默監通精誠及笄于歸李刺史百兩將迎耀閭里方期
鸞鳳常和鳴豈意鴛鴦竟雙死

何本孟東
野烈女操

當其未死時

誓死心無移父曰有舅在何遽捐生爲前室子女皆汝
兒汝死汝兒將誰依舅命既有待父命尤難違水漿絕
口復入口中懷輾轉肝腸摧越日舅使至云欲取孀歸
子女有依妾心慰妾夫待久奚遲遲焚香遙拜與親訣

拜畢一慟氣已絕衣襟零落霏金屑結襠剛及十八月
爲女則孝婦則烈夫語煌煌表綽楔我無黃絹辭愧
難傳奇節惟願與孝娥之碑烈女之操同勒金石同播
管絃傳之億萬斯年名不滅

古蓮花池歌

一泓碧沼澄無波雞距泉水通城河游泳樓

樓名

前夏無

暑嶙峋怪石成巖阿古池云是張柔鑿新渠循市來西

郭有元厯今五百年遞增堂榭樓兼閣中流架石起危

橋臨漪畫檻影落遙

臨漪亭元張柔所建今廢

水鑑空明光泚泚

明萬

爾爾書屋詩草卷二

六

恩間知府查志隆拓其地增建堂廡福日水鑑

市塵隔絕城中囂我朝

憲皇十一載書院之修遍寰海講堂敕闢蓮池旁

樸菁莪齊貢采今年湘鄉相國開府來保陽好賢更詠

緇文章

設禮賢館於池上

片長並許登薦牘授餐適館誠心將

我來正值冬子半冰沍殘荷流已斷想見當年花盛時

紅衣翠蓋裝池面蓮花自昔稱君子品潔香清泥不滓

濟濟羣賢集此池問誰堪與花相擬謬荷褒嘉負愧深

金函銀榜拜瑤琳

拙著全史宮詞及疊雅二種極爲相國賞識欲留主蓮池書院講席余以

親老力辭相國爲太息者再贈所梓王船山遺書三百二十二卷並手書德侔歐母四字額爲家母壽無

才仰答求賢意惟矢蓮花不染心

過北河楊椒山先生讀書處

燕谷雲橫天欲暮驅車直上河陽渡道傍突兀見崇碑
大書椒山讀書處椒山剛烈本天生肝膽全憑鐵鑄成
勵學早嚴忠佞辨建言豈計官階輕是時天子方高拱
宰相青詞承厚寵朝班靡靡皆私人獨有先生不爲動
仇鸞驕怯嚴嵩奸惡嵩更甚惡仇鸞其初刻鸞遭貶謫
嚴嵩委曲遷其官嵩因素與仇鸞隙心善先生首攻擊
歸令氣節少委蛇通顯何難致瞬息忠臣惟識報君恩

那識私恩出相臣草奏鋤奸中夜起淩風大叫排天閭

天閭萬里誰能扣獬豸磨牙正蹲守無端觸邪來神羊

一角未伸中機穀五姦十罪雖昭彰反坐偏緣引二王

廷杖無情肉狼藉沈沈狂狴飛秋霜幽繫三年天怒歇

嵩亦將納王材說

王材官司業嵩門生也爲公居間見公自輯年譜

誰言養虎

自貽患奸相聞之殺志決昔會狄道化夷番獨有奸邪

總嫉賢公志已拚逐龍比公心何屑恨胡鄆賦詩西市

天容慘浩氣丹心常凜凜世無怕死楊椒山

用公語

死前

早卻蚍蛇膽雨疏流傳壘尙新如公方稱讀書人讀聖

賢書學何事世間佔畢徒紛紛當日分宜亦名士十年
謝職勤書史至今談及鈴山堂猶使千秋人切齒

琉璃河鐵篙歌

長虹百尺驅鼉鼉行人指說琉璃河上有一鐵倚橋柱
傳是梁臣撐船之物同摩挲我來下馬細審諦魁然重
足千鈞多上歧下銳形勢古其脩詎止身三過誰能操
此作舟楫齊東野語真堪呵古來鑄鼎象物皆有以此
非鎮水將云何鐵篙當緣鐵槍誤亦如琉璃劉李相傳
譌冒者彥章臣梁著臣節五代雜傳難同科胡爲叛逆

如存孝彼偏得譽此遭訶

世俗演劇恆譽李存孝而毀王彥章

千古是非

任顛倒謬悠之口多偏頗試聽趙家莊上中郎曲孰將

漢書列傳陳縵繭今朝欲辨鐵槍事濡毫聊作鐵篙歌

題楊挺生刺史

廷熙

我與我周旋圖

香山有九老竹林有七賢人以類聚自古然何爲我止
與我相周旋人生溷跡紅塵裏往往徇人而失已今君
守默得真吾世人那得窺其旨吾思物皆吾與民吾胞
前賢往哲堪神交我外卽人人卽我無人無我心超超
君不見仕止久速無不可宣尼母我何爲者它年利濟

天下應同拔一毛慢云楊子真爲我

祁門令

令姓唐名治句容舉人咸豐四年正月死難桐城方明經宗誠戴孝廉鈞衡皆爲之傳

祁門令守巖城四圍賊如蟻祁門無一兵請兵上官無人磨丈夫早視死如生賊至登城與賊擊城破被執罵愈力賊怒磔之水爲赤令死賊去上官來祁民求尸河水隈令尸出水祁民哭上官欣然報克復

梁氏二烈女詩

覺覺者女無母何恃哀毀不欲生而姑爲忍死爲母撫

子一解

咸豐三年歲次癸丑粵匪南來靜海不守獨流

之鎮枕衛河賊據爲巢藪持人逃者居者齊遭踐蹂二

解

時女母長已矣時女父病不起賊騎紛紛亂如蟻女

去父留父將誰倚父亡女存女無全理事已急矣復奚

俟向父再拜垂泣涕善事嚴親屬二弟二解

初刺其喉

繼據其胸兩劍不絕神復從容投纆別室氣以終貞魂

上達凌蒼穹

四解

女兮女兮年甫及笄身繫千鈞命盡

一絲賊入見之命覆其屍嘆爲烈女咸無異辭有女如

此父何悲以死慰父父應知

五解

昔女有女弟襦結而

夫亡仰藥以殉夫志節嚴秋霜妹以烈著姊復爾先後
輝映無頽頽於今綽楔之建出 當陽千秋彤史同

流芳

六解

噫嘻乎死爲世所疾管仲猶欠一二女視死

竟如歸巾幘鬢眉兩無匹我聞有梁嬬爲漢和帝姨節
行之瓊瑋二女能配之又聞天津上列須女星間氣往
往鍾娉婷九烈墳頭土花紫煌煌苦節今猶馨惟此二
女稱後勁何殊陳氏季方之難爲弟與元方之難爲兄
此其貞烈由於性成況有庭訓之明厥父爲誰曰梁墨

香先生

刲股吟爲孝女陳婉作

俛錢塘人抱潛太守女也太守於道光二十七

年曾爲吳舍人

兆麟

黃太史

彭年

作刲股辨蓋

以表閭門之賢且以破腐儒拘墟之說也越十
有九年而適有季女婉刲股療母之事蓋其教
家有素矣

刲股刲股女心何苦女心雖苦母病愈母病既愈女無
楚世間鬚眉男子紛紛何足數有身甘爲貨財妻子殉

猶云親之遺體不可輕毀侮刲股療疾古所聞動以非
禮求名相齟齬孝女刲股出至情豈知悖禮與沽名不
解沽名名遂顯阿翁曾作刲股辨

飯桃歌

有序

同治辛未冬直隸制軍合肥伯相李公開局於
古蓮花池奏聘貴筑黃子壽太史

彭年

重修畿

輔通志屬任

信成

恩

福

二觀察寓書邀余襄贊

其事余以親老不克往太史虛懷善受時以疑
義相商前既又以楓林家乘見眎屬爲題跋其

賢母錄一篇乃太史述其妣左太夫人之事實也婦德母儀美不勝書中有斷炊食鄰家桃實一事讀之令人感泣成都張君懋畿爲撰飯桃詩附載篇末因襲用其題作長歌一首此雖管中一斑而婦德母儀諸大端已櫟括其中矣時家母壽踰八旬又以五世同堂得邀天寵海內名流賜祝嘏詞者百數十輩歌成錄寄並徵壽言

昔聞黍雪桃今將桃代黍猗與誰家媛食貧甘如許卓

嘆黃母左夫人相夫教子能安貧夜半篝燈伴夫讀萊
蕪往往甌生塵懶書乞米帖疇爲輸粟秦北門賢者嘆
終窶室無交謫眉常伸鄰有種桃叟系出東家某鄰爲孔先
生亦寒士也隔牆聞書聲與夫稱密友以桃相餉充饑腸阿
姆殷勤亦餉母咽李何傷仲子妻取棗豈似王陽婦異
日夫榮子亦貴大烹之養君恩厚賢母不忘飯桃

時敢云芻豢悅我口惟有廚竈必躬先膽桃撰栗皆親
手不爲隕穫不充詘女而士行信無負綏山一桃安足
豪飯桃爭咏鄰家桃今日爲桃添故事桃花從此彌天

天我母茹藥六十載松竹經霜柯不改八旬五世邀

旌褒海內詞人助舞綵先生如肯頒新詩蟠桃何啻
賜瑤池我作此歌寄君子聊當投桃思報李

爲游太尊題攀轅圖

有序

永平新太守游公名智開字子代湖南舉人前
以保舉知安徽和州有惠政同治己巳湘鄉侯
相曾公由兩江移節畿輔奏調來直辛未夏補
授灤州未期年政成民和頌聲四起奉

特

旨擢守永平蓋異數也憶己巳冬仲余被徵至

保陽桐城方存之先生過訪定交方與公同寓
因得至其所居隘巷埤垣門不容旋馬望而知
爲廉吏也茲因灤人繪攀轅圖以送其行廣徵
詩歌爰作長句寄題其尾以識欽慕欣忭之意
云

我聞北齊清河太守宋世良攀轅昔有丁金剛三十五
政銘肺腑欲留不得心徬徨又聞東漢揚州刺史嚴王
思詔因民留遂留之每遇遷官卽如此十八年依慈惠
師今我游公牧灤郡持較前賢無少遜兒寬講學移民

風陽城撫字蘇民困數月之間政大行教養兼施孚以
信我居鄰邑百里近日仰仁心慕仁聞召杜不來父母
誰翻因健羨成私恨

朝廷任官惟賢才用人破格

無疑猜知公愛民如愛子不次之擢源源來又以民情
愛戴不忍負不擢他郡擢永守雖不必揚州刺史常我
留終不似清河太守非吾有寇君之借出

天恩天

於此邦亦云厚灤人方攀轅永郡齊額手治永卽治灤
畛域夫何割昔我邑侯于襄勤開府保陽功不朽宦蹟
始末在畿輔公當超遷踵其後灤人灤人且莫留黃堂

仍在古平州我惟願逐兒童隊竹馬歡迎郭細侯

登澄海樓

海上三山不可卽仙人樓閣際天極四千里外起罡風
吹來臨向滄溟北滄溟之北山重重長城劃斷關西東
南趨入海行且止勢如峻坂迴奔龍龍奔欲駐首昂起
雲霞萬丈摩青空危樓高壓老龍頂雕梁畫棟疑神工
蜃氣變幻或相似憑欄俯瞰冰穹宮鯨吞鼉噏深莫測
驚濤捲地鞭靈靈三十年前會到此旌旗獵獵斜陽紫
秦皇幄畔築新營記得海防自茲始當時欲棄終軍繻

前纓無路空踟躕今來登眺頭已白海防視昔當何如

列聖東巡此

駐蹕展歌髣髴唐虞初樓上

天章輝日月樓前地界接蓬壺樓建今逾二百

載雨剝風摧形漸改荆南太守謀鼎新

光緒二年太守新化游公重修

輪奐依然發光采舊稱澄海海應澄金勝猶題

御賜名安得海氛淨如掃千秋常並黃河清

梅花外子歌

井序

郡守游公以詩集見示內有梅花外子歌一篇

梅花外子者衡州彭雪琴侍郎別號也侍郎善

畫梅因自號以此前以水師破小姑山賊巢有
句云彭郎新奪小姑回蓋用小姑嫁彭郎之諺
也洵稱天作之合今又欲喚梅爲妻獨不畏小
姑生妬和靖含嗔乎因戲作此以爲梅花解嘲
幾生修到梅花福玉骨冰肌不偶俗胡爲仙子住羅浮
屢向人間稱眷屬當年曾入師雄夢月明林下傾春甕
自從嫁得老林逋頓令伉儷情增重翩翩鶴子胎成仙
天寒共守孤山前暗香疎影善寫照何須後來畫手粉
墨爭鮮妍湘南彭老今豪傑坐鎮長江心似鐵偶將餘

事寄丹青獨於梅花稱妙絕溪藤百幅光融融千枝萬
蕊迴春風紙帳銅瓶偕臥起夢魂常與花神通醉來把
盞對花語約卿一事卿應許京兆畫眉我畫梅畫梅亦
爲添眉嫵巢居閣

林逋
故居

廢園林荒標梅期誤嗟傾筐我

今欲準小姑例尹邢一並歸彭郎彭郎舊是彭鏗叟娶
妻何妨過卅九與卿好合百千年誓與小姑山並壽梅
聞此言應致辭許耶否耶不可知羅敷有夫君有婦攘
非其耦將奚爲息媿歸楚情堪悼三年不見桃花笑梅
花若肯學桃花低頭應拜夫人誥

唐杜牧之有題桃花
夫人廟詩夫人蓋息

也種梅處士家西湖花嶼爭傳放鶴圖我到西湖將問訊梅妻改醮君知無

前詩已成太守謂詩則佳矣惟於梅節有傷奈何因思彭侍郎與林先生前後同婿於梅氏或當相謂曰亞爰續成二絕以懣口過

梅花外子劇風流鐵幹瓊葩畫筆道同向羅浮稱快婿應呼和靖作邢侯

一歸處士一高官縞素家風卻一般若倚門楣論骨

相九姨終笑七姨寒

用青箱雜記
劉龍圖事

遊華不注山

卽晉述齊師三周處

巨靈手斷太華臂擲向濟南插平地孤峰特起凌蒼穹
毅然揮使羣峰避縱橫野水趨山根匯合名泉七十二
波光一片浸芙蓉暮靄朝霞蒸紫翠峯山遙望城南隅
三面嵐光相翼蔽晉齊之戰經千年山色依然蟠黛髻
我來弔古扣禪關破廟荒涼古佛殘當日三周遺跡在
華泉指點餘寒煙

華泉舊有井今涸

昔聞丑父右公易公位早

開紀信誑楚計紀信誑楚以忠死丑父得免真幸事一

時勝敗安足論代君任患今幾人問之山僧僧不答春

山無語開笑靨

爲桂林倪雲臞司馬

鴻

題冰天躍馬圖

平沙萬里連天白冰雪漫漫少行跡誰跨追風突兀來
云是桂林老詩伯桂林山水奇絕倫洞天棲止多仙真
何期桂海驂鸞客

桂林山水奇秀韓文公在潮聞之有詩云遠勝登仙去飛鸞不暇驂范石

湖帥廣西時著有桂海虞衡志其紀行之作則以驂鸞錄名之

翻作冰天躍馬人問君

躍馬將何邁揚鞭欲出盧龍塞方今中外皆一家域民
創盡封疆界北洋遠接東西洋冰海更在冰天外樓蘭
月氏若閨闔何數張騫與傅介聞君今已渡澎湖淡水

雞籠繪陣圖

近有臺
灣之行

大瀛環抱幾蝸角蠻爭觸鬪胡爲

乎邇來生番半歸化或勦或撫資良謨鯨鯢潛伏豺虎
虐島夷未殄煩驅除定羌策籌海編將軍幕府開紅蓮
叱日功成論爵賞應偕褒鄂圖凌煙我生不作封侯夢
撫髀猶自心爲恫展閱斯圖思與共追隨亟整青絲鞵
所憾衰遲無所用君自躍馬我驅牛春雨一犁古陌頭
但乞雲林妙手點筆鵝溪絹愿將詩酒所寓舟車所經
一一悉付丹青留庶得藉君壯游爲臥游

意大利里亞國馬戲歌

車騎闐門金鼓沸行人蠟聚情如醉紫竹林中正作場
爭道西洋來馬戲戲稱以馬戲何居吐蕃蹀馬或其遺
跳猿舞象鬪犀兕並及虎豹與熊羆踏索尋橦無不有
更番間作惟駟驪直立馬背如錐立橫擔斜抄形離奇
玉鐙低藏蜻點水金圈連躍鶯穿枝哄堂喝采齊拍手
赤髮碧眼誇妖姬我聞謝莊賦舞馬明皇馬舞金殿下
項羽曾留戲馬臺此戲彼戲殊難假魚龍百戲昉西京
走丸跳劍吞刀并偃師傀儡始作俑黃公角觥今留名
石虎之時尙猿騎馬頭尾脇任游戲

走馬或在頭或在
脇或在尾馬走如

故名爲猿騎
事詳鄴中記

中華馬戲實肇茲正值羶腥汚內地古先

玩好戒奇異奇技之興皆季世戲雖矬造尙當祛况乎
盜襲來攘利世傳西法精厓家豈知法亦始中華奈何
數典忘其祖勾股競推歐羅巴數理精蘊出 御

譏泰西算法何足算鬼工巧說奪天工眩人多與馬戲
同

放歌行

山未著五嶽之屐水未泛五湖之舟向平婚嫁已早畢
志和家宅眞堪浮半生不得意思爲汗漫游欲游湖嶽

終未果天胡靳此非多求人生嗜好殊奢願良難酬聚
妻願得陰麗華生子願如孫仲謀東坡老饕事游宦又
願有蟹無監州我生俱不願及此所願似不與人侔富
不羨卓鄭貴不希王侯功名不必匹衛霍文章不須追
韓歐但願薄有腰纏跨鶴背左攜洪崖右浮邱綠章早
晚奉天敕定當分付詩囊酒榼拱俟我於十洲三島五
城十二樓

天津楊節孝張氏輓辭

耶無子女妾有尊章耶今已矣尊章在堂尊章在堂年

已邁子死二老將奚賴欲殉不殉心徬徨恐節無虧孝
或礙阿翁痛子中道徂阿姑咀痛稱孀姑黃鵠歌中鵠
並寡青鸞鏡裏鸞同孤蟲聲咽寒砌燈影暗空幃與姑
同室形影俱姑心無恫妾心娛甘旨供罔缺杖履親爲
扶病侍湯藥殯殮葬十年拮据手口瘡昔未殉夫爲事
姑今姑又逝復奚圖甘心絕粒辦一死殉夫殉姑無差
殊况以婦職代子職黃泉相聚應歡呼南國有貞姬東
海有孝婦誰則節全孝復全惟有斯人兩無負

德詩書屋詩草卷三

樂亭 史夢蘭 香厓

五言律

過馬秀才山莊不遇

一壑晚雲白結茅松檜陰
亂泉分細溜殘果落疏林
戶閉主人出山深何處尋
隔籬聞犬吠獨立對遙岑

送友入都

匹馬燕京去金臺話昔遊
輕裝殘卷在邸壁舊題留
塵世誰青眼他鄉易白頭
前程難預問歸老故山邱

登永平城樓

風雨孤城暮危樓接太清
亂山肥子國野水漢家營
飛鳥衝煙出長虹壓浦明
古來征戰地憑弔不勝情

宅東園數畝池亭花木麤
有位置佔俾之餘時
遊玩其間致足樂也
客有謂園尙小者因賦東園四時詩以答之

莫道東園小春來滿院花
柳絲抽碧玉杏纈醉紅霞
水煖魚先覺林深鳥自譁
還分牆外地一半種桑麻

莫道東園小亭虛夏亦涼
蒲桃張翠幄芍藥鬪紅妝
移

石栽新竹分泉拓小塘不知炎暑酷一覺竹方牀
莫道東園小逢秋亦灑然窗鳴黃葉雨井暗碧梧煙築
圃雲堆屋停琴月照絃釀成新菊酒更喜晚菰鮮
莫道東園小經冬景倍添雪晴花滿窖日曉雀爭檐煖
酒煨殘火攤書整舊籤梅花香入夢睡醒不開簾

曉渡渾河

馬首背初陽征衫冒曉霜河流湮故道秋色滯他鄉
遶樹圍燕綠平沙接汴黃遙知千里外白髮倚閭望

東光縣

指點觀津路衛河抱郭門屋貧多覆土寺廢半成園秋色城邊樹斜陽水上村望諸何處弔極目晚煙昏

楊村道中

避潦無常路南轅復北轅斷鴻投莽蒼疲馬畏黃昏闌關斜通浦帆檣聚作邨征鞭回指處煙樹擁津門

黑窰廠寓目

一帶坡陀起還留異代名野花無節序老樹半枯榮葭菼園荒寺煙霞傍禁城誰將林下酒徧酌古先生

送友之甯遠

仗劍出榆關春風匹馬閑去家四百里覽勝十三山邊
柝夜驚夢村醪朝借顏白雲親舍在屈指計君還

自題松陰讀史小照

是我還非我今吾卽故吾麒麟羞作植牛馬任相呼論
史腸猶熱吟詩興不孤放翁團扇裏肯許入林無

感事

傳說南來信安危未可論中原思祖述海上嘯孫恩推
轂朝廷重分符將帥尊黔黎正塗炭誰爲達重關

書張禹傳後

一代推經學通經卻昔經未逢斬馬劍且請肥牛亭臣
志圖溫飽君心重典型後堂絲竹盛只許戴崇聽

送才齋堂

宇和判官泗州

送君如明月直上東南山聞道五河口今年稼穡艱民
窮應易撫官小尙能閑洗耳臨風聽頌聲朝暮間

九蓮庵晚歸遇雨

策蹇出禪扉行衝暮鳥歸綠苔盤磴滑紅樹亂峰圍日
腳穿雲破風頭挾雨飛孤城何處是一徑入霏微

寄懷王五橋同年

陸昌

夜發梁園日樓前記見君

辛丑春開五橋寓梁家園自小山總憲宅樓下海棠花開

盛今當春月暮已作隔年分雨漲滹沱水風開渤海雲
相思千里外對酒不成醺

和常職卿東園題壁原韻

村居無箇事此更絕塵埃佳客有時至雜花無數開禽
魚應共樂詩酒鎮相催嘉樹勤封殖先人手自栽

和楊晉田東園題壁原韻

共踐諄芳約緣溪結伴來題詩捫壁蘚布席拂階苔北
海樽常滿西園客並才管絃林外發魚鳥漫驚猜

奇石雙峰豔深林一徑通燕歸茅屋雨人立藕花風借
蔭牽蘿爲登盤摘芥菰好音時惠我相對愜幽衷

戊申中元陰十七丈將赴顰昌幕與常職卿楊魯
田同集東園卽席分韻贈別二首

急雨洗殘暑客來松徑幽詩懷空渤澥別思繞秦州老
圃花初落邊庭草易秋離亭一杯酒折柳當觥籌

久屈登瀛客翻爲入幕賓鵬程應尙遠鶴俸不醫貧風

雨過三輔琴書伴一身赤亭兵戢否西去問煙塵

去年
聞生

番不
靖

山行

茅屋圍蒼翠松林一徑遙石多泉響碎村僻犬聲驕掃
地安樽杓談天聚牧樵夕陽紅半樹歸路有鳴蜩

擬訪常職卿因雨不果

窗竹鳴秋籟懷人夢寐勞晚涼蚊市散薄雨蟻封高望
益開三徑驚年感二毛何時新釀熟相對把霜螯

春曉偶成

庭樹上初日雙扉松下開曉風醒鳥夢夜雨結花胎尙
友書千卷封侯酒數杯連朝無客至滿砌繡蒼苔

登盤山雲罩寺

晌午登山頂到來天已曛
峯高平見月衣溼暗生雲
薊樹連河盡邊城隔嶺分
憑欄一長嘯帝座或應聞

自雲罩寺回宿天城寺

滿山鐘磬響何處問天城
歸寺客將倦到門僧已迎
松寒風墜鼠人定月窺楹
欲證無生理空堂佛火明

過高經略橫灤別墅故址

地已歸禪寂猶存別墅名
殘僧迷舊事老樹變秋聲
水落山根豁雲開岸脚明
謝公墩自在一任後人爭

袁大令仲賓以紈扇見貺詩以謝之

驕陽如酷吏威逼汗交流忽惠清風至全教畏日收團
樂形似月搖動氣先秋更願還持贈揚仁徧海陬

閔邱報四首

分間資名將專城重守官不當臨難處那信致身難草
野輸軍急 朝廷馭吏寬跳梁原小醜何以肆兇殘
酷甚東河水田廬盡蕩然天心縱魚鼈人肉飽烏鳶保
息思周政懷襄痛禹年如聞髑髏語猶幸免戈鋌

食貨曾分職何爲擾 聖心有天難雨粟無石可成金

嶺綾山輝洩糧艘水道深所司須敬慎莫使吏胥侵
咄咄此么麼潢池盜弄戈誰教養癰潰其奈噬臍何狡
爾兔三窟紛如蜂一窩宋建炎中有盜名一窩蜂惠哉鄭子產火烈
洽輿歌

溪上

溪上路橫斜孤村三兩家短籬酸棗樹老屋苦匏花雀
鬪爭殘果蟲鳴上晚瓜從茲學農圃世外有生涯

晚眺

倦鳥投何處長林抱幾重日低明野水雲斷起孤峰蒼

口間呼鴨籬根隱泣蛩鐘聲臨路發徒倚晚煙濃

獨坐

獨坐倚西風藤陰落照紅孤花留晚蝶敗葉卷枯蟲
氣候趨嚴肅年光半歉豐
吟秋興句愁絕杜陵翁

青龍河泛舟晚歸

扶醉上歸船蒼茫暮色連櫓聲搖碎月山影沒寒煙
亂石驚湍急疏林野火圓遙聞僮僕語秉燭候城邊

偏涼汀晚望

月上西峰頂平沙澹欲無江雲橫浦斷漁火對山孤
市

散荒墟閑船歸隔岸呼臨流一眺望秋思入菰蒲

久雨

久雨天如醉崩騰勢挾風隰田沈朽麥破屋捲秋蓬人
共憂荒歲時方重戰功擁衾不成寐起坐望長空

次韻和史君牧寄題東園二首卽以招飲

自顧同樗櫟甘心木石居遊仙時託夢悟道不關書身
世原如寄林泉合守初桃源隨處是安問武陵漁
連朝風雨霽春到已多時老柳將垂綫殘梅尙戀枝甕
浮新釀酒牆有舊題詩屈指花朝近開樽對槿籬

疊前韻寄君牧重訂東園賞花之期

吾宗老詩伯蓮幕當幽居住佳句皆心得奇文半手書

性喜

敘知音憐我少識面感君初婚嫁他年畢相將伴釣漁

小聚花朝日分襟又幾時苔岑思舊雨草樹發新枝佐

饌親挑菜攤箋重和詩流鶯方喚客莫待菊盈籬

適鐵珊和

作有重醉菊秋離之句

祁季聞刺史步韻枉贈并訂過飲因三疊前韻奉

酬卽用促駕

觥觥賢刺史下邑暫留居鄭相多遺愛郎公好寫書循

聲傳

紫極才調適黃初異日灤陽去

公將卽真灤州牧

應思

北海漁

春色行將別留連駐少時
麥初搖細浪花漸有空枝待
客方溫酒懷人忽寄詩
明朝風日美擁帚候東籬

四疊前韻贈張心航學博

我愛張平子官閒似隱居
到門無熱客堆案有奇書
妙

詠迨長慶蕪辭錄仲初

前索觀拙作全史宮詞選錄三百餘首

桃花今正

發好共狎秦漁

小飲荒園日逢君奉候時

花朝約飲東園君適奉府檄監送東兵未得如約

今

來傾竹葉尙喜對花枝野老容分席同人競索詩

時君牧以

召獨無和章

作詩調之 陶然須盡醉斜日透疏籬

五峰重謁韓文公祠

山色青如舊荒祠跡已蕪白雲迷洞口蒼蘚沒碑趺
俎豆千秋接文章八代扶南天尙烽火誰共鱣魚驅

九日止園

又值重陽節登高到止園白沙城外路黃葉水邊村
地暖霜偏晚山深日易昏相逢多舊雨快倒菊花樽

晚入山口遇雨

雨到四山暝撲人嵐氣腥溼苔滑瘦馬深樹閃孤螢
磻
黑路疑絕窗紅燈正熒泉聲亂人語撼壁走雷霆

文房十詠

硯屏

侯封分卽壘邦大此維屏不使風沙溷聊爲匡匡形大
蘇傳月石小范護涵星我亦資藩翰朝朝鸛眼青

水滴

水以中丞號惟茲潤硯田筆耕資雨露壘入化雲烟聊
以涓埃報休教利澤偏授時還用汝壺滴漏聲傳

筆帽

豈無食肉相冠賜管城侯廉鐔藏鋒日英雄養晦秋臨
池時露頂脫帽亦尖頭雖處囊中者還能末見不

墨盒

欲吐胸中墨憑君染翰頻潔常嚴啟閉堅不避緇磷擁
絮經綸裕鏤金製作新相因如倉粟所忌在陳陳

鎮紙

先生原姓楮坐鎮得良儔不畏飄風起應從介石謀品
惟資厚重氣總戒浮游漫道無文采安劉屬絳侯

臂閣

幸毋交臂失一臂助微勞借爾扶持力令人手筆高功

成身自退任重節無撓祕閣頭銜貴司分著作曹

臂閣名

祕閣見林洪文房圖贊

韻牌

到處詩脾挂先將韻作牌尖叉爭巧思拈弄約同儕籌
共金杯數班如玉筍排牙籤三萬軸一例插書齋

詩筒

當今幾詩伯唱和託郵筒離緒三秋劇吟情兩地通但

憑黃耳寄不用碧紗籠愧我非元白殷函欲達空

界尺

之子邦司直從心矩不踰事人無枉道律已亦繩趨篆

跡扶蝌蚪斑紋削鷓鴣

用華山道士蘇志恬事

光逢溫如玉文行

本來殊

裁刀

成章斐然者狂簡未知裁此以利爲利能齊材不材從
繩期正正游刃自恢恢漢更多刀筆蕭曹何有哉

四君子詠

方書以人蔘黃耆白朮茯苓爲四君子蓋以其
性溫厚和平能補益人也然用之不得其所或
佐使非宜則亦不能奏功國家用賢豈異是哉
爰作四君子詠

人蔘

物以人爲體於人最有功丹期還姹女藥足助梁公異
種星精散嘉名上黨同當王今更貴佳氣鬱遼東

黃耆

門望推綿上如綿性獨良典刑尊老輩色味應中央不

愧王孫號曾傳柳后方懷風有小草偽學更宜防

首菰根可

以亂

白朮

朮字形惟肖於潛品最優書生誇白面奴子別蒼頭固

氣黃婆

脾神名

健修容黑子收作甘資土味理向五行求

茯苓

嘉茲不死麪

茯苓別名

祛溼有奇功與世交原淡惟神美在

中兔絲千尺碧虎魄萬年紅數典休忘祖遙遙十八公

過三屯營弔戚少保

偉矣南塘續當年此鎮邊風煙東道靖鎖鑰北門專貝
錦成萋萋韜鈴託簡編角巾歸第後儒將幾人傳

景忠山謁三忠祠

祠祀諸葛武侯岳
武穆王文信國公

千載心如見三忠作等觀得天皆正氣遇主盡偏安古
殿春雲合空山落照寒瓣香思往事誰識古人難

清風臺望孤竹君祠

隔水荒祠在居然啟聖宮子能稱義士父亦藉清風而
麓長林豁當門小舸通憐君有中子國祚久成空

角山雨望

筭與衝雨上極目角山巔一水曲通海兩峰高插天邊
城隱雲樹沙渚浸鹽田寫此空濛景憑誰付米顛

山角山回宿天后宮

雨歇禪堂靜三更酒半醒濤聲寒入枕風力暗穿櫺作
達思齊物勞心感寓形夢魂忘路險猶戀角山亭

七里海晚泊

一白渺無際真堪以海名船孤依鴈宿村遠少雞鳴敗
葦如山積寒星墜水明漫嫌太岑寂終夜夢魂清

十二連城懷古

城爲明李景隆
禦靖難兵處

十二城邊路荒荒故壘平強藩方靖難懦將詎知兵天
意興亡定人謀勝敗爭齊黃成底事憑弔不勝情

千佛山

風雨來初地脩然萬慮清但看林際水莫辨樹中城上
界鐘魚靜遙天鴈鴛橫山靈應笑我參佛不知名

樓閣臨無地蒼茫暮靄沈亂雲牽客思疎雨冷禪心洞

憶黔婁被山有黔

山有黔婁洞

風懷帝舜琴

山本名懸山傳爲舜耕處上有舜祠

笛輿

歸去晚望古一長吟

涿州旅次步海上芋僧題壁韻

溪鹿城邊路軒皇迹渺然共傾燕市酒誰著祖生鞭斜
日窺雙塔長橋滙百川蚩尤今未靖西望亂山煙

張桓侯故里

三國推三傑桓侯此故鄉樓桑同井邑刁斗亦文章苔
蘚豐碑沒風沙驛路長威靈今尙在應爲掃欃槍

詠園鹿

養就山林性軒庭未易馴清閑宜伴我飢渴亦親人萃
野懷前夢蕉渥悟幻身紫芝如可採煩爾駕蒲輪

藏園觀察書訂重陽偕游西山翠微寺諸勝詩以

畝之

平生幾兩屐有約負名山興到猶忘老書來爲解顏丹
楓黃菊外紺宇翠微間屈指重陽近煙巒許共攀

送游子代觀察陳臬蜀中

忽報

綸音降賢良簡

帝心治河三策重陳臬

五刑欽

北闕書名久西川望澤深寇君無處借空戀

舊棠陰

數載桑乾別何堪更遠離半生知己感萬里宦游時鶴
髮憐遲暮蠶叢繞夢思愧余豚犬輩鰲鈍負培滋

兒孫素承

青眼迄今尙無
寸進以副期望

劒閣萬山盤休言蜀道難江花迎去旆峽雨濯征鞍自
有文翁化遙臘長懽行將蒙 顧問蚤晚候長安

蹤跡分南北臨歧各黯然秋風湘水岸春樹蘄門煙猶
憶高軒過應知舊榻懸魚鴻如有便同慰古稀年

和梅小樹枉贈原韻

盼過梅花信東風寄一枝恰當春暖日共保歲寒姿縞
紵非關物因緣總在詩新交原舊識回憶少年時

嗜好酸鹹異誰將臭味聯故人悲宿草

知交半多凋謝
卽及門中亦有

作古者如景幻夢悟遊仙書檢瑯環地詩吟玳瑁天宛

君其一也陵家集在惟任老夫傳

近又以尊甫吟齋先生古文屬爲甄錄

和小樹見懷原韻並畱其書中之意

又見詩筒到殷勤慰暮年春風身正健落月夢同圓飲
啄吾闕命升沈敢怨天羣真方下顧忙煞我梅仙

題晉兒初學吟草

三唐詩取士今日竟如何愛此閒家具

世之攻舉業者目詩古文辭爲

閒家具殊乖制舉科窮通有時命歲月莫蹉跎龜勉斜川

集憑將慰老坡

五言排律

贈陰子企明經二十二韻

大雅久寥寂先生誠古人文瀾資砥柱學海指迷津情
思遵周孔淵源溯洛閩枕中多秘寶席上蓄奇珍幸我
居相近常教訓屢親忘年論氣誼請益切咨詢風雨燕
臺路江山孤竹春方期鵬共奮豈識蠖難伸世業青箱
舊功名白蠟新劉蕡偏下第原憲竟長貧抱壁羞干楚
懷書恥上秦囊錐材未展鑄硯志彌純雅度金堪式清
修玉不磷萊衣欣舞綵范甑任生塵理臈黃婆健存心

赤子真授徒宣四教讀楚化三嘆

好楞嚴

芸蠹訛憑勘窗

鷄性最馴

性好鷄常畜數十翼坐臥不離

文章終有價道德詎無鄰桂

下彭鏗老礪溪釣叟淪從知輕桂籍定許就蒲輪特達
圭璋品後雕松柏身他年儒行傳載筆付詞臣

武秋瀛明府八旬壽詩一百韻

縱目臨洛道山川阻且長知心千里隔僂指卅年強回

憶論文日同馳校藝場彈冠期貢禹勵學約朱昂

初先生

秉鐸於樂

遂以定交愧我駑材鈍輸君驥足翔屈身甘似蠖奉母

且相羊

蘭自庚戌落第後遂絕意進取

別後升沈判閒中日月忙光陰

其冉冉鬢髮各蒼蒼離緒雲停浦孤懷月照梁衷思傾
盡話願未折梅賞忽報魚箋至如聞鵲語祥西平欣有
後南極正垂芒欲藉松喬祝恭稱斂澁觴平生要最久
行實說能詳

已卯臘月接到手書長君用
章以先生八十壽言見談

門望崇鄒國

家聲振溢陽恩榮新紫綬事業舊青箱岐嶷由天畀溫
醇本義方髫齡初象舞壯氣早龍驤訓記庭趨鯉功勤
壁鑿匡舍飾承祖樂如葉慰親孀范硯詒謀遠茅雞孝
思彰祛邪懲赤臭養志比黃香冷映孫康雪貧燃顧簿
糠奪標魁俊彥發軔始膠庠勉勉希前哲印印保令望

觀頤安汝止考履慎其相品重豐年玉材儲儉歲梁棟

楠歸大匠廩餼出神倉

先生年十五失怙事大父及母以孝聞十八歲爲諸生旋食廩

餼名噪一時

更羨連枝秀齊騰奕葉光難兄驂二到詰弟踵

三張集共珠聯寶懽偕被覆姜對床眠夜雨詠草夢春

塘好是敦廉讓殷然擁縹緲細吟朋招短李賦筆敵長楊

名士經綸手文人錦繡腸諸昆眉盡白予仲甲先黃

先生

弟二人仲酌堂成進士官比部季禹襄貢成均皆其教也

藻采相焜耀科名恰頡頏

棣華風藹藹桂苑露懷灑夙仰師儒範羣推學博良規

條遵鹿洞講席據鯁堂巧借金鍼度才憑玉尺量四科

英濟濟六館士樞樞共沐先生化能裁小子狂廣宣槐

市教繼擷杏林芳茂宰分花縣鄰邦近厲鄉荆山高嶧

嶧灕水沸湯湯

道光甲午舉於鄉主講秀治書院甲辰大挑二等選授樂亭教諭成材甚衆咸

豐王子成進士以知縣分發河南甲寅十月補舞陽縣令

治請宜探傳生祠合祀王

謂王

十朋適郊除碩鼠燬室救頽魴訟息雀無角政成蠲有

筐但教鞭示辱豈作法于涼造士歌薪樞巡農勸柘桑

禁恆申佩犢輕復戒從狼

在任五載案無留牘每夜分必出署巡邏禁賭博懲盜賊

下鄉檢驗訊無他故卽當場了結絕無株累邑有舞泉書院又有普濟堂收養貧民惟經費無多先生捐廉修舉俱有實政在人 叵耐妖氛惡誰憐洞轍傷寇俱搖異幟公獨

切同裳設備邀崔郾開誠率廖剛耒鋤皆胄櫓忠信仰
餽糧竟使民安堵奚憂盜弄潢洿稱美且武應俾熾而
昌爲念萊衣在尤虞菊徑荒上官正推轂下邑忽投裝
韓許崔戎抱碑難宋璟忘背來符剖竹此去蔭留棠祖
帳遮前路攀轅泣數行圖書充宦橐琴鶴趣歸艤邑與
角子山爲鄰擒匪咸聚其中先生激厲鄉閭互相聯絡
復練勇二百拏獲巨擒李八千碎李四能人等數名聲
威大振丁巳春擒匪蕭况等囑聚萬餘人不時竄擾先
生率衆登陴分堞防守並隨南陽鎮邱忠壯公入山勦
捕生擒百餘人殺斃無算名列薦章奉旨賞帶藍
翎加同知銜已未皖匪孫葵心等擁衆十餘萬踞北舞
渡繞城四面皆賊先生嬰城固守衣不解帶者十晝夜
危城得全大吏深爲嘉獎擬調升信陽遂以母老告歸

去之日紳商士民攀轅者以萬計留
其韓縣之城門立德政碑於東關 周密癸辛里許渾

丁卯莊漁樵尋伴侶名利脫羈韁種藥低園檻編籬矮
過腐棋敲紅葉寺茶滄綠蘿房閉戶烟霏篆隔池紙截
肪雲窗橫劍匣蕙帶拂書囊院靜階翻蜨村晴樹噪螳
逸蹤追栗里幻跡悟蕉隍時勢烏瞻屋乾坤蝨處稻幾
人急流退達者善刀藏世味從來淡躬修敢弗憂窮交

資舉火薄俗革停喪成黨霑仁粟州閭飲義漿

同籍後養母讀

書不與外事而地方要務必身任之昔郡城多停棺不
葬年久棺朽甚有暴骨露尸者先生請官出示復偕同
人所在勸諭凡無力之家及無歸之骨悉籌資
殯之風俗爲之一變貧苦親鄰無不曲加周恤庶徵決

休咎

先生精天文地理奇門六甲諸書

渥澤及枯僵邑乘存文獻

新修永年

縣志先生

鄉賢賴表揚

鄉賢閭公允中著有芸窗易學一書幾至失傳先生邀集同人

之力居多

鄉賢賴表揚

郡城東南隅坍塌已久先生商籌資付梓繕城嚴鎖鑰之官倡捐三百金紳商鼓舞應

之城垣一

練勇慎開防

謂籌勇糧

薰德兼陶淑

謂修書院建義學

周

飢拯歉歉

謂平糶

耆英堪入會畫錦快增坊惟以培基厚

彌徵降福穰護庭躋上壽梓舍衍餘慶偉器刑巒擬佳

兒蔡廓當鵬程知未艾駒齒已非常郭憲成均選寶陽

駕部郎阿翁猶畏鑠厥嗣正明淑貴卜衙排戟禎符渭

釣璜荀興孫笑捧藤杖子扶將茲值懸弧際羣趨戲綵

傍賀筵逢燕喜

宸誥煥鸞章

以子用章官兵部郎中誥封通奉大夫

杯泛糜欽酒餅盛卻老霜雕屏環匝寶炬射輝煌賜
帛還頒几吹笙並鼓簧囊調胥進雉客集儘騎鳳瑤帙
珍雙笈仙璫奏八琅介眉儀秩秩拜手珮蹕蹕未得陪
簪笏聊思頌阜岡拈毫呈百韻用禱永無疆